

祝 NPV 一周年快樂，呢一年來，好多謝診所嘅醫護人員，多謝管理層，多謝 NPV 救助過嘅貓狗，多謝帶動物來求醫嘅動物主人。經過各方面嘅配合，先可以成就到呢件美事。見到 NPV 嘅成果，每次見到 D 動物主人帶住動物好滿足咁離開診所，我心裡面果份喜悅係吾可以形容嘅。

作為 donor，我自問能夠為動物做到嘅只係好微不足道，憑我嘅少少知名度，少少影響力，少少資金，呢 D 少少少少加埋，竟然可以成就到一班愛動物嘅人嘅理想，成就到非牟利獸醫診所誕生，貢獻到社會，係我嘅福氣，亦都係我生命裡嘅一件大事。今日我同 NPV 所做嘅，只係一個開始，我希望用呢少少嘅正能量能夠喚起社會對動物權益嘅關注，啟發更多朋友去珍惜人與動物之間嘅友誼，好好去善待呢班人類嘅好朋友。

自從 2000 年開始，我參與左好多吾同嘅公益社會工作，特別係動物福利方面嘅。大家都知我好鍾意動物，喺我嘅心裡面，吾單只我屋企嘅動物生命寶貴，所有生落來嘅動物，包括街上面嘅流浪貓狗嘅生命都同樣寶貴。所以喺兩年前，當 NPV 嘅創辦人亞 Mark 同我提出動物公立醫院嘅構思時候，我心裡面已經好激動，已經立定決心好好去協助佢做好呢件事。呢一年來，有好多好多個夜晚，我同亞 Mark 都會喺電話或者 MSN 上面分享分擔診所裡面發生嘅大小事，由動物來打防疫針到皮膚病，由心臟病說到腫瘤，因為呢 D 事吾只關乎動物本身，仲關乎動物同主人之間果份情，所以我都會好緊張同上心。一周年啦，我地做到左獸醫服務貧富共享。每次見到動物主人對 NPV 充滿信任同感激嘅眼神，我都好替 NPV 嘅每一份子驕傲。今日嘅成功有賴多方面嘅努力，除左醫生護士管理層之外，仲有一班完全無受薪嘅執行委員，Dave, Veron, Phillis, Grace, Alex, Janet 同埋亞 Mark 佢地不問回報咁為動物付出，無私同毅力。仲有亦要多謝每一位義工，我有幾次去到診所，都見到一班年青人，放假吾去玩都來診所幫手，做清潔等等嘅工作，好有心，好感激。我代表所有受惠嘅主人同動物衷心多謝佢地。

新一年，我祝願 NPV 做得更好，所有動物都生活得健康愉快，社會更加美好同和諧。最後，我為 NPV 承諾大家，NPV 會繼續努力，多謝。